



La Ligia Grischa ei preparada bein

El concert dalla dumengia vargada a Glion ha il chor tradiziunal presentau il niev portatun e demussau ch'ìls cantadurs ein sepreparai per la Fiasta da cant naziunala a Gossau.



Dirigent Christoph Cajöri engrazia al president dalla Ligia Grischa, Aurelio Casanova, per sia gronda lavur per registrar il disc cumpact, organisar il concert e la viseta dalla Fiasta da cant Federala.

PAUL DUFF/FMR

FOTO PAUL DUFF

Sch'igl applaus final dil concert dalla dumengia vargada ei ina mesira ed in indicatur per ina buna prestaziun, lu ei il cranz dad aur la proxima fin d'jamna alla Fiasta da cant naziunala per il chor Ligia Grischa gia ordavon sin sia bandiera. En baselgia dalla **claustra dallas soras dominicanas** a Glion beneventa sora *Madlene* ils cantadurs ed in grond publicum. Ella fa ei adina cun ésprit e cun humor. Aschia anfla ella ch'ìls cantadurs dalla Ligia Grischa mondien bein a prau cun la soras pertgei lur cravattas segien en ner ed alv sco las rassas ed il vel dallas soras.

Cuntrasts marcan la reputaziun dil chor

Per ordinari ein las canzuns tradiziunalas «La Ligia Grischa» (D. Sialm/F. Camathias) ed «Il pur suveran» (H. Erni/G.A.

Huonder) reservadas per la fin dil concert sco supplements. Dirigent *Christoph Cajöri* pren las ovras all'entschatta e lai aschia gia arder il fug da plaschers al publicum. Il volumen da vuschs virilas ei deliberaus ellas canzuns liturgicas da Dmitry Bortniansky «Izhe Cheruvimy e Da ispravitsia». Las ovras ein cantadas ed interpretadas en lungatg russ aschi loms e plein vocals. Per interpretar en melodia il cuntegn d'ina ovra litterara astgan ils tuns era sgrar e las vuschs far span e debat. Talas melodias vegnan buca scurladas ord la mongia e pretendan dils cantadurs d'emprerder e d'esser segirs da tact e melodia. «Il pégn» (Gion Antoni Derungs/Lothar Deplazes) descriva la resistenza dil pégn el stemprau ed il ruas en si'umbriva, cheutras mischeida mol e dur la situaziun ambivalenta. Medema-

mein cumpona Gion Giusep Derungs la canzun «savens» aschia ch'ins auda co la scadiola va en scalgias e tradescha il sentir. «E cur ch'ella va manez marsiala lu has ti la pagaglia ed eis pli da negin» (text: Gion Deplazes). L'ovra pretensiusa en tuts graus ei adattada sco canzun da pag alla fiasta da cant. *Ignaz Cathomen* ha tschentau la viarva sur dil sanctuari da sogn Rumetg. El implora gest da dar schurmetg ed esser la petga sin la via al destin. Cun fin sensori ha *Gion Balzer Casanova* mess ils patratgs en melodia.

Ovras da Tumasch Dolf e digl uestg v.Grüneck

Sil viadi en Val Schons s'entaupa La Ligia Grischa cun las ovras da Tumasch Dolf (Egl jester e La patria) e Benedetg Dolf (Aurora en muntogna e Dorma,dorma). Duas ovras da Joseph Bovet e Paul Miche en lungatg franzos cun tempra muntagnarda suondan ed il viadi va uss a Berlin cun la canzun da Kurt Weil «Zu Potsdam unter den Eichen» (text: Bertold Brecht), interpretau «kurz wie Weil Kurt» e text «echt Brecht». Il punct final ha plaschiu en special; «Il paun palus», La canzun digl uestg G. Schmid v. Grüneck (1851-1932) vegn buca cantada savens, ei aber tuttina ina ovra impressiunonta. La melodia cuntegn ina pulita purziun «italianità» e carsina l'ureglia. Il tact «alla marcia» animescha e staccatos ein igl echo da «cuolms e vals resuneschan dal Bernina al péz Badus». La canzun cantada cun slonsch e vigur d'in chor sco la Ligia Grischa ha muentau quei «stumi grischun» e ladinamein ei il publicum sesalzau per applaudir ed engraziar per la purschida.

Il disc cumpact

Tuttas melodias dil concert ein cunteni-



das el niev disc cumpact ch'el chor Ligia Grischa ha ediu e presentau al concert dalla dumengia. Il president dil chor, *Aurelio Casanova*, ha engraziiau als cantadurs per lur engaschi, a dirigent Christoph Cajöri per la biala mischeida da canzuns tradiziunalas e modernas e per siu sustegn professional. In engraziament special retscheiva *Giusep Giuanin Decurtins* per la lavur da registraziun entras Radio-televisiun Svizra Rumantscha (RTR) e per ses cussegls e sia reputaziun en tala lavur. Cul president d'in chor vai savens sco cul fotograf ch'ei mai sin sias fotografias mobein davos la camera. Il parsura astga cuort beneventar il publicum als concerts mo sia lavur ei davostier el zuppau. Dirigent Christoph Cajöri ha quella gada priu Aurelio Casanova ord la retscha dils cantadurs ed enumerau las incaricas ch'il president ha giu duront ils davos dus onns. Manischar las restricziuns da corona per ils cantadurs che han stuiu emprender las ovras cantadas, organiser las emprovas e lura la registraziun dil disc cumpact cun emprovas e cant d'entirs dis. Il concert ha dau lavur da metter sin peis e la Fiasta da cant federala dalla fin d'jamna vegnenta ei medemamein organisada en detagl. Aunc pliras autras causas ein stadas sin sia gliesta da duers ed ein e vegnan liquidadas conscienzusamein. Sper quei pensum han ils numerus visitaders dil musical Frisal-Frisal entupau igl Aurelio leu sin tribuna. Aschia astga la publicitad dir ch'el vivi per il cant romontsch e persunter survegn el cheu in engraziament ed in grond compliment.

Il punct culminont pil cantadur

Per ils cantadurs ei ina Fiasta da cant federala quei eveniment special che ha liug mintga quater onns. La fin da quest'jamna sepresenta il chor Ligia Grischa a Gosau sogn Gagl a quella festivitad. Las bialas sentupadas, tedlar cant d'auters chors e la fiasta en cumpignia promovon igl anim da cantar e star activs ella cultura.

Beinsavend che lur cant el chor Ligia Grischa ei apprezziaus d'in grond publicum sil palancau naziunal san ils cantadurs sentir sco stars en quei gener ed els dueien guder quels muments vivificonts, nus selegrein e pudein cuir quei ad els.

Il disc cumpact sa vegnir empustaus sin www.ligia-grischa.ch